

2 CROONICAS 5-7

Tanee Croonicas Naajionee

5 ¹Salomoon jaara tari tojetaarucua-janaa tucuataniquiaari tiatenu Pueyaso secojojua tia, secojojua tiacora pooteree puetunu orojiniji, platajiniji shipinijosano casamijianaari. Tiajiniaaco nocuajinio riuriotaca sohuacamara na racataniriiri. Puetunu cuno casamijianaani, cunoori camarnu David quishacarijia Pueyasorano na jiyatesano quiriquiase.

Pueyaso quiijia cojee tiuquinitiasacari na riuriotacajiniaaco

²Jiyacaritij, Salomoonri nio narta Israelcuajinio caneno pueya masuunujuquiaari: puetunu narta pueyajinijinio jiyaniijianucujanaa, puetunu nojori supuetana Jacob doce niquiohuacuajinio caneno maapue jiyaniijianucujahuaj. Cuno pojoriiri socua tojishano pueya quiijia puetunu nojorijinijinojuanaa. Salomoonri naa cuno jiyaniijianucua masuunujuquiaaritij, Pueyaso quiijia cojee na pacutunura suhuortu cariquioco na cajitiasaquiji. Pueyaso quiijia cojeeri Sioon tiacajinia cajitiaja, camarnu David tiacajiniatuahuaj.

³Jiyacaritij puetunu supuetana Israelcuajinio caneno canujujanaari camarnu Salomoon rerejotaquiaari na queranacutunura. Jiyacaritij, siete

racaari tariucua shocojono quiriquia cuno marijiara. Cuno nojori queranacunu juucani, jiyanhua nojori pueresano juuca quiijiaari. ⁴Naacuatej, puetunu Israel pueya jiyaniijianucujanaa jaara tiuquiijoquiaari, supuetana Leviicujinio caneno pueyacuara secojonaari Pueyaso quiijia cojee pataquiaari na cajitiasaquiji. ⁵Na caco teecojua toqueyari tutojosaarejuhuaj, puetunu tii quiijia Pueyasorano jiyatesano casamijiaajanio. Pueyacuara secojonaa pueyari puetunu cuno casamijianaa pootuquiaari. ⁶Camarnu Salomoonri puetunu pueyatajanaa tii rerejoquiaari. Pueyaso quiijia cojee tacojini, puetunu cuno pueyajanaari queraatia na seya borrecohua, juyaca puecooriquiaari Pueyasora na nanaca na shootetusocoriquiano. Naa jiyanhua seya quiniucua Pueyasorano puecoosocoriquianotej, majaari na naata serojosaanu quiquiaari taa seyateja puetunujanaa quiriquiaani.

⁷Na nuhuaji, pueyacuara secojonaa pueyari Pueyaso quiijia cojee tiuquinitiaquiaari secojojua tiajiniaacuma, nocuajinio jeenucuasano sohuacamara. Cuno sohuacaari sesojosaaquiaari “Pueyaso Quishaquiijianaa.” Pueyaso quiijia cojeeri juhua Pueyaso seya niquishano nesuhuaraca cariquioco niatasaree.

⁸Cuno nesuhuaraca jeecojosano casaari Pueyaso quijia cojee caco teecoriquiaa. Na nesuhuata maninia nucuriquiaa Pueyaso quijia cojeeri. Cuno cojee patataja na shuucuaaji shuquitasano macaca nucuriquiaa maninijaariuhuj.

⁹Cuno, Pueyaso quijia cojee na shuucuaaji shuquitasano quijia na patatajarani, cuno querajamaaca macacaari puera tucumaaca quiriquiase. Naacuatej, na nacatucuaari tamonu sohuacajiniji maatia niquishano quijia, maja puetunu cojeejanaa. Naa quiyajaa tii quiarijiaari.

¹⁰Pueyaso quijia cojeejiniaacumani, mii niojosano quiriquiaari Horeb tuhuana-nuucua Pueyaso niquitiojosano Moisees querajaa saajianeeeca. Pueyaso naajiojanaari cuno saajianeeecaaca quiriquiase. Israel pueya quiojosacari Egipto jiyajiniji, Pueyasoori cuno na naajiota nojori toquiaari nojuajanaari nojori cojiniutianiyacuaja nojori jaara na naajio tojjiaa quiri.

¹¹Na nuhuajij, pueyacuara secojonaa pueyari Pueyaso secojojuajiniaacoji tohuareetaquiaari. Puetunu nojorijianaari tama na cuaqueyajaaja tariucua Pueyaso jiyanoootinio quiriquiaa. Naacua juhuajaniya cojecoriquiaa secojojua tiajiniaacoori. Nojoriiri maja na maapueta na sanitijiootonu quiriquiaa. Puetunu nojorijianaari jatiqui cojecoriquiaa. ¹²Jaaquenuunu niishijia-ca supuetana Leviicuaajinio caneno pueyari tii quiriquiaa. Nojoriiri nio pojori quiriquiaa: Asaf, Hemaan, Jedutuun jiyanishanonio. Puetunu nio pojori jaaquenuunaari necohuata socua tama tapueyocucatajaaja pananu muetasamajiria Pueyasora seya catijiaja nujuataja taquijiria nujuaturiquiaa. Puetunu nojorijianaari linojiniji shiyosano toqueya maniniuquiya cushiyonuuriquiaa. Naajuhuj, puetunu nojorijianaari juhua coshi tootiu

niquishano piitiasano “ciimbalo” jiyanishano muetujuriquiaa, taquiniosano “salterio” jiyanishanojuhuaj, taquiniosano “arpa” jiyanishanonio. Tii nojori cojiriquiaajaariuhuj ciento veinte “trompeta” jonenenuunaa. Nojoriiri pueyacuara secojonaa quiriquiase.

¹³Jiyacaritij puetunu cuno pueyajanaari Pueyaso na maniniuhaqueetanura mariyataa jatiqui coteeturee na trompeta jonenenuunu, jaaquenuunio. Naajuhuj cuno nojori jaaquejosanota Pueyaso sequeturiquiaari paacaraasho. Nojoriiri na piitiasano casaata cojuatuneriquiaa, na taquinionuusano casaajuhuj, nojori jonenenuusano casaajaajanio. Nojoriiri nio jaaquejosano jaaquenuuriquiaa. Na sequeyari: “Pueyanaa, Pueyaso nia maniniuhaqueetare. Nojuajaari tojetaarucujanaa maninia. Na paniniuuri puequeyaquijia.” Jiyacaritij, cohuaja najacaari Pueyaso secojojua tiajiniaaco cajiquiaari. ¹⁴Naacuatej pueyacuara secojonaa pueyari maja na naata tucuatatunu quirii secojojua tiajinia nojori miiniu panishano juucua. Naa na miituniu panishano tarinitiatuquiaariiri Pueyaso shacantuuca cumaaca cajiniucua tii nojori quishaqui Pueyaso secojojua tiajiniani.

Salomoon jiyatesacari tia, Pueyaso Secojojuara na quiniuria

6 ¹Jiyacaritij Salomoonri sanequiaari. Naa Pueyaso sequereeri: —Quiaacuajaari naa sequenotej, Camarnujuanaanaa: “Janiyaquijia ninishiqui quiyacujua.” ²Saniniuujia janiyari naacua quiocuajia tiaterucuaaquij, tii quia quijia pueyaracaanu.

³Na nuhuaji camarnu Salomoonri narta pueyacu jiriquirehua. Puetunu

cuno pueyajanaari nujuaturiquiaa. Pueyari jiyanoehua queraatia na tacoji mariquiaa. Jiyacaritij, camarnu Salomoonri naa maninia rupaajinia sequeree na tacoji maano pueya:

⁴—Pa supuetana Israel Pueyaso cuaara shuquiriaatia quiiria. Naacuatej, Pueyasocuaajaari quiarjiaa tari tohuateeree naa cua shipininio David na sequesano: ⁵“Egipto jiyajiniji cua jaatianujiniji cua saquiriojosano pueya, majaari juhuanojuaja cua saquiriojonu teyano Israel niquiohuacuajinio caneno pueya maanu tiacajinia cua tiatenutaniyani, cuno tiaco cua sesa cojuasaanura. Naajuhuj, majaari juhuanojuaja cua saquiriojonu teyano pueyanoteja cua saquiriojosano Israel pueyajiniji camarnu quiriqianoni. ⁶Saniniuujia quiari naataja janiyari Jerusalem tiaca saquiriojorucuaani tii cuno tiacajinia cua sesa cojuasaanura. Naajuhuj, janiyari David saquiriojononi cua pueya jiitiriqiano.” ⁷Naacuatej cua shipininio Davidri Israel pueya Pueyasorano tiatenu paninio juucua cuno tia quiniuria Pueyasorano seetanujuanaa. ⁸Saniniuujia, Pueyasojanaari naa na sequequiaari: “Quiaacuajaari maninia miya, cua quijiara quia tiatenu paniniuucua. ⁹Saniniuujia, cuno cucuaji tiateriquianoni, majaari quiajaniya. Nojuajaari tama quia muetusocoriquiano quia niyanujaaja. Nojuacuajaari cua quijiara tiateriquiano.”

¹⁰Pueyasocuaajaari seetanujuanaa na sequesano tohaterucuaa. Naacuatej janiyari cua shipininio David niti quia camarnu quiarjiani. Naa cuarta Israel pueya camarnu cua quiniuucuatej, janiyari Pueyaso quijiara tiaterucuaani. Nojuajaari Israel pueya Pueyasocuaaja. ¹¹Janiyari cuno tiajiniaaco niatarucuaa Pueyaso quiquo cojeeni. Cuno

cojeejiniacuma niatasano quiyacuajaari seetanujuanaa Pueyaso miishocoriquiano na sequesano pajaniyara na Israel pueyaniqui.

¹²Salomoonri na nuhuaji Camarnu Pueyasora catijiaja juhuacutu tacoji nujuaree. Puetunu tii quiniaa narta Israel pueya niquiarajanaa shiitioeree jiyocuacaanu na juaashiquiaaari. ¹³Salomoonri broncejiniji juhuacusano juhuacutumjini niquiariquiaa na pocuasacari. Cuno broncejiniji juhuacutuuri querajaa metro jiitiriqiaa socua veinticinco centiimetro na tucohuana. Na cajiniocua shanacuuri naa quiriqiaajuahuaj juhua na tucohuanajuhuj. Juhuacutu jiyaconajaari niquiriyatu metro quiriqiaa socua treinta y cinco centiimetro. Salomoonri cuno juhuacutu jeecatequiaari. Secojoju tia cari jiuujiajinia na nujuaretaquiaari. Salomoonri jiyacari puetunu narta Israel pueya niquiarajanaa mojoquetaree. Jiya cajiniocua na juaashiquiaa na shiitionuta naa sequereeri:

¹⁴—Camarnujuanaanaa, Israel pueya Pueyasonaa: Jiya cajiniocua, nio jiyacuajaajanio, majaari socua Cumaa-caraca Quijia quiniu juhua quiajaniyaja. Quiaari quia sequesano tohuateja. Quiaari quia paniniu toquiaa, noo pojori canapuetucuaaja quia panishano miiquiaa puetunu noojiatajanaani. ¹⁵Quiarjia nio juucajani, quiaari tari tohaterere tariucuaaanu seetanujuanaa quia miishocoriquiano quia sequesano cua shipininio David. ¹⁶Naacuatej Camarnujuanaa, Israel pueya Pueyasonaa, tariucuaaanu cua shipininio David quia sequesano quia tohatererejuhuaj. Quiaari naa na sequenotej: “Quia muetusano quia niquiohuajinijini, pueyaracaanu niquiriyatu nojorijinijini nioori camarnu quiriqiano cua Israel

pueya jiitariquiano, nojori jaara maninia miijiaca quiri, naajuhuj nojori jaara niaarano cua naajio tojijiaca quirijuhuj taa maninia cua tojijia quia quiquiaaricuan, Davidnaa.” ¹⁷Naacuatej Camarnunaa, cuarta Israel pueya Pueyasonaa, quiarjia quia tohuatere seetanujanaa quia seru cua shipininio David quia sequesano.

¹⁸¿Seetanujanaatejanonjoni? ¿Pueya-sotee na naata mijiria quiniu pueyatani? Jiya cajiniocuaari puequetuuju, naajaa puera shiitianiyojuuari quia quijjara. Socua niotejaj, pueya secojojuara quiajaniya cua tiatesano quia quijjarani. ¹⁹Naajaa cua Camarnu Pueyasonaa, quia tojiricuaraja cua masenu quiajaniya. Quenaaja quia tojiricujaja nio quia jiyaraajia sequesano quiajaniyani cua masesacari quiajaniya. ²⁰Maja cutaraari quiocuajinio cua riuriotaca tiacoji pooni, juuca niucuanio. Tama quiajaniyajanaacuaajaari sequeno quiaari nio tiaco quiriquiano. Quiarjia nio quia jiyaraajia sequesano quia tojiricuaraja quenaaja. ²¹Nio tiaco cua secojosacari, quiocua quiria miiriquia cua masesano quiajaniya. Quiocua cuarta Israel pueya secojosano tojiriquiajuhuaj. Jiya cajiniocua quia quiquiojinijini, quiocua tiji tojiriquia quia secojonuujuaca nio secojojua tiaacuara nojori jiriquionuta nojori secojosacari, tamaqui nojori quishacari. Canaa quia jiyanooriquiajuhuaj sesa canaa miishanojiniji canaa seetaaquishacari quiajaniya.

²²Pueyano jaara taa miiri narta pueyano, sesa miiijaari shiniujiushaariquiano seetanujanaa sesa na miishano na pohuatanura quiara seya catijajaja tajoji maja na seetanura sesa na miishanojiniji. ²³Quiocua jiya cajiniocuaaji tojiri nojori secojosano. Quiocua nojori masesano miiri nojoriria.

Quiocua quia panijiaca pueyacuaji tacuriquia. Saniniuujia sesa miijiaca quia saniitioriquia sacuaraatia nojori miiniucua. Nojoriicua quia tiuutiariquia puetunu sacuaraatia nojori miiijosanojanaa. Saniniuujia, maninia quia miiriquia sesa miyaquijiaca.

²⁴⁻²⁵Canaa paraa jaara quia Israel pueya shocotare canaa miaquetoosacari, cunoori sesa canaa miiniucua. Canaa jaara seetanujanaa pishiri sesa canaa miiniujinijini, canaa maniniuuhuaqueetasacariuhua quiajaniya, naajuhuj, canaa jaara nio secojojua tiajinia quia masere canaa quia jiyanooniuria, quiocua jiya cajiniocuaaji canaa masesano tojiriquia. Naacuatej, quiocua canaa riujuutiriohua canaarano canaa supuetanaarano quia niquitiosano jiyajiniuhua.

²⁶Maruqueya jaara niyaquiri tojetaarucujajanaa, cunoori canaa quia pueya miiniucua sesa. Sesa canaa miiniucua canaa quia saniitionuucua, canaari canaa pishiniutia nio secojojua tiajinia quia secojonutaniuhua canaa maniniuuhuaqueetanuta quiajaniyani. ²⁷Quiocua naacua jiya cajiniocuaaji canaa secojosano tojiriquia canaa seetaaquishacari sesa canaa miiijosano. Naacuatej quiocua cuarta Israel pueya jiyanoori. Canaa quia niishitiojore maninia miijiaca canaa quiniuria, maja canaa jiyajenenura. Naacuatej, quiocua cuarta Israel pueya jiyarano canaa quia niquitiosano jiyacua maru nitiriquiacuaa.

²⁸Quia tojiyashijiaca canaa quiniucua, quiaari naa canaa saniitioriquiano: miaajenuuri quiriquiano; canaari ritia pacujua cusonu puequetariquianoni; nataacuacaari macuhuajeriquiano maru niyaquiniucua; mauri moririquiano jiya tojenuucua; sequeruuri jiyanohua caneriquiano; nataacuaca paracaajia

canashuriuuri caneriquianojuhuaj, socua tamasa nataacuaca paracaajiano; canaa paraari canaa quijia tiaca cosejoriquiano canaa na miaquejonura. Naajuhuj, canaa jiyoteeri taa miishaariquianojuhuananij, cusununu puequetariquiano soj.

²⁹⁻³⁰Jiyacaritij, pueyano secojosano quia tojiriquia, puetunu canaa quia saquiriojosano Israel pueya secojanojuanaano. Canaa jaara naquiya canaa miiquionuucua canaa juaashiquiaca shiitiore nio secojojua tiaacuara canaa secojosacari quiajaniyani, quiocua quia quiquio jiya cajiniocua-ji canaa masesano tojiriquia. Quiocua canaa jiyanoori sesa canaa miiniuucua, quiocua canaacia taraajere maninia canaa miiniuucujuhuj. Quiaacuajaari puetunu pueyano jiuujiajanaa niishiya, na niishiriojosanojaajiano. ³¹Naa quia jiiitiasacari quia pueyatej, canaari quia panijia, quia tojitiajaca quiniutianiya canaa quishacari canaa supuetanaarano quia niquitiosano jiyajiniani.

³²Naajuhuj, tamonu jiyajinijinio tahue jiyoteri niya tiuquiniutianiya na secojonura quiajaniya, na niishiniuucua quia cumaacata quia miishanoori seetanjuanaa nocuaji jiuujiatesano. Cuno tahue jaara nio secojojua tiaacuara na jiriqionuta quia secojore, quiocua na tojirinioj. ³³Quiocua jiya cajiniocua quia quiquojiniji puetunu na masesanojanaa miiriquia nera. Naacuatej, puetunu jiyacajinia quijia pueyajanaari quia niishiniutianiya, quia maniniuhuaqueetatunutaniyajaariuhuj. Nojoriiri naa miiniutianiyaajuhuj taa canaa quia Israel pueya miiquioquiaacuani. Nojori cuara niishituriyajuahuaj, quiaari nio secojojua tiaco maniniuhuaqueetasano, quiocuaji cua tiatesanoni.

³⁴⁻³⁵Canaa quia saquiriojosano pueyaniqui, canaa quia sanatasacari canaa paraa canaa miaquejonura,

canaari na miiriqianoni. Quia saquiriojosano Jerusalem tiacaacuara canaa jiriqionuta canaa secojosacari, nio quiocuajinio cua tiatesano tiaacuarajaajiano, quiocua jiya cajiniocuaji canaa secojosano tojiriqiuacuara quenaaja. Quiocua canaa naacure sacuaraatia miijia canaa paraa canaa miaquejosacari.

³⁶⁻³⁷Saniniuujia, canaa jaara sesa miiriquia saajani, quiaacuajaari niishiya pueyanoori saa sesa miiniuucua netejaja. Quiaa jaara naa sesa canaa miiniuucua canaa juaatiaretej, quiaari canaa paraa shanacunutaniya canaacia, canaa cuara quioosaria taucuaca jiyajiniara. Canaa jaara tama canaa jiyajiniji pacusaare tucuacaanuni, catecaja soj, naajaa, quioosano jaara taucuaca jiyajinia sesa canaa miiniuucua canaa jiuujia tacatosee canaa pishiniuucua, quiocua canaa secojosano tojiriquia. ³⁸⁻³⁹Canaa paraa jiyajinia canaa quishacari, terara canaa quioosaanutaniyacuajani, canaari canaa pishiquionuucua canaa jiuujia tacatonutaniya quiocuan. Canaari naacia quia secojonutaniyaquij. Naacuatej, canaa jaara canaa supuetanaarano quia niquitiosano jiyacuara canaa jiriqionuta quia secojonuure, canaa jaara secojonuure quia saquiriojosano Jerusalem tiacaacuara canaa jiriqionutajaniuhuj, quiarano cua tiatesano secojojua tiaacuara canaa jiriqionutajaajiano, quiocua canaa secojosano tojiriquia jiya cajiniocua quia quiquojiniji. Quiocua naacia canaacuaji tacuriquia sesa canaa miiniu panijia. Quiocua naa canaa quia saquiriojosano pueya jiyanooriquia sesa canaa miishacari quia niqiara.

⁴⁰Cua Pueyasonaa, canaa quia pueya quia cojuariquia. Nio secojojua tiajinia canaa masesano quia tojiriquia.

⁴¹Camarnu Pueyasonaa, quiocuajinio cua tiatesanojiniaaco quia jiiriatasee cumaacaraca quia quiquio cojeetaja. Pueyacuara secojonaa pueya cuaara quia jiyanootiiriquia quia pueya. Canaa quia tojjijaca pueya cuaara shuquiritiaara maninia quia miijionuucua canaani.

⁴²Camarnu Pueyasonaa, majaari pueya camarnurano quia saquiriojosano cua samiritianuujua. Noo quia niishiriqia, quiaari maninia miinio cua shipininio quia jiyaraajia David.

7 ¹Naa Salomoon tucuatasaari secojonutej, maniiri jiya cajiniocuaji tiquii. Pueyasorano catijiasocoriquiano puecoosano seya catijiaree puetunujuanaari. Pueya niqutiojosano seya catijiareejaariuhuaj. Jiyacaritij, Pueyaso shacantuuca cumaacaari secojojua tijajiniaaco cuhuataree. ²Naacuatej, pueyacuara Pueyaso secojonaa pueyari maja na naata tiuquitianu quiriqiaa secojojua tijajiniaaco. ³Naa puetunu Israel pueyajanaa niquishacari Pueyaso shacantuuca cumaaca roseyano secojojua tijajinaratej, nojoriiri jiyacari Pueyaso na timitiatunura jacamaturee. Na jiniji rupeteturee jiyocuaari. Nojoriiri jiyacari naa na sequenuta Pueyaso maniniuhuaqueetaree: “Pueyasoori maninijuhuanajaj. Na paniniuuri turetaaquiriqiano, quiriqianojuhuanaari.” Pueyaso secojojua tia cariiri puetunu mishiquiosanojanaa quijia shanohua cumaraacua casaata tee pueya quiriqiaacuajani.

⁴Na nuhuaji camamu Salomoonri puetunu Israel pueyatajanaa na seya puecootequiaari Pueyaso jiyanooniuria nojori. ⁵Camamu Salomoon puecootesanoori quiquiaari veintidos mil juunu, ciento veinte mil borrecohuano.

Camarnu Salomoon, puetunu narta Israel pueyajaajanio, nojoriiri naa jiyacari jiyatetuquiaari saaja Pueyaso secojojuara cuno tia quiniuria.

⁶Jiyacaritij, puetunu pueyacuara Pueyaso secojonaa pueyajanaari na miishano cojetacoriqiaa. Naajuhuj, supuetana Leviicuajinio caneno pueyaniqui, nojoriiri Pueyaso maniniuhuaqueetajara tariucuaaanu camarnu David jeecojotesano casaa jonenenuuriquiaa. Taquinionuuriquiaajaariuhuaj. Puetunu nojorijianaari nio jaaquejosano jaaquenuuriquiaa. Naa sequeyari: “Pueyaso paniniuuri quijijuhuanajaj, naa pueyaraaanu quiriqianojuhuanaari.” Jiyacaritij, puetunu Israel pueyajanaari jaaquenuusacari nujuaturiquiaa. Pueyacuara secojonaa pueyari trompeta jonenenuuriquiaa pueya tajoji. Nio jaaquejosanoori tariucuaaanu camarnu David jaaquejosano quiriqiaase.

⁷Secojojua tia cari quijiaari curosano canetaa. Salomoonri cuno jiyatequiaari Pueyasoranojuhuaj. Naacuatej, Salomoonri tii catijiateree nojori jiyanooshaanura pueya niqutiojosano tama nojori seyajaaja. Pueyasorano puecoosano seya shiyocua catijiaree tijjaariuhuaj. Broncejiniiji na jeecatesano juhuacutuni, cunoori jiyacari puera shiitianiyojua quiriqiaase. Naacuatej, majaari na naata jatiqui puetunu nio casaajanaa catijiasaanu quiriqiaa; juyaca, trigo cashojua, juyaca shiyocuaajaajanio.

⁸Jiyacari nojori queranacununi, tarishiquiaariiri siete juuca Pueyaso catijiaja juhuacutu jiyatesaanura tojetaarucujanaa saa Pueyasoraja. Cuno pueya, Salomoon rerejotaquiaari queranacunuucuanu, nojoriiri pananu muetasamaji Hamat tiacajinijinio jiyocuara puetunu cuno jiyajinia quijia tiacacajinijinio pueya quiriqiaase. Quiriqiaajaariuhuaj jiyacora pananu tiuquishacora Egipto jiya namiquiiumia neteja moo casaqueeji quijia pueyajuhuj. Jiyanhua quiriiaati

pueyari quiquiaari. ⁹Na nuhuaji nojoriiri socua niquiriyatu semaana queranacuaaari. Cuno naa nojori queranacununi, cunoori quiquiaari nojori niishiriojonura nojori supuetanaari tariucuaacaanu cariiquia jiyajinia nojori camarucunee-tasacari suhuortucuaajinia quijiaca quiquiaari. Naa nojori queranacununi, tama nojoriijaarijia na sesojoquiaari “Ruquetucua cariquioco quishacari.”

¹⁰Naa nojori queranacusacari jiyacaritij, cunoori tari veintitres juuca setiembre raca shocojosacari quiriquiaa. Jiyacaritij, camarnu Salomoonri puetunu tii nata quiniaa pueyajanaa jiyaramiquiquiaariuhua puetunu nojorijianaa cuaara nojori tiacacajinia quiojohuara. Naacuatej pueyari shuquiriaata juhuajaniya quiojorohua. Pueyaso maniniuhuaqueetaturiquiohuari maninia na miiniuucua supuetana David, nojori camarnu Salomoon, puetunu narta Israel pueyajaajanio.

**Pueyaso sequesacari Salomoon,
Israel pueyari seetanujuanaa
maninia miishaariquiano jaara na
tojitiajaca quiri**

¹¹Camarnu Salomoonri tari tojetaarucuaajanaa Pueyaso secojojua tia tucuataniquiaari, tama na quijiarano tiajaajanio. Puetunu cuno querajaa tiajiniaaco casaajanaa tucuataniquiaariiaariuhuaaj teyonu na niishiriojoquiaari miiniucuaajani. ¹²Jiyacaritij, Pueyasoori nocua muetaquiaari niucua. Naa na sequereeri: “Quia secojosano tojiriucuaacuaajaniya. Nocuaajinio cua riuriotacacuaaja, nio quiaa tii nujuaratarucuaa secojojua tiani, tii pueya catijiajara na seya quiriano. ¹³Naacuatej, maninia quia niishirinio: Niaa jaara cua shocotejacara quiriohua, janiyari niaacua

jiyaroriquiano tacareejonuni. Maruuri tojetaarucuaajanaa niaquiriqiano. Naajuhuaaj, janiyari sequeru miaqueteriquiano cuhuariquiacajinia nia nataacuacani. Janiyari niaacua shanacuriquiano ritia pacujua cusonujaniuhuaaj. ¹⁴Saniniuuja, cua saquiriojosano pueyani, cua pueya nia quiniuucua, niaari cua sesaatiaa. Niajaniya jaara shocoteyaquijiacara quiriohua, niaa jaara juhua naatujoori cua nenecojonuure cua jiyanooniuria niajaniya, niaa jaara seetanujuanaa cucua shiiniuquiutiare nia secojotusacari, janiyacuaajaari nia secojosano tojiriquiano jiya cajiniocuaajini niaa jaara seetanujuanaa tarinitiatuure sesa nia miijionuunu. Naajuhuaaj, janiyajanaacuaajaari sesa nia miijosano jiyanooriquianoni. Janiya jaara naa maninia miiri niajaniyani, janiyari nia nataacuaca moritianiriquiano maniniajaniuhuaaj. ¹⁵Quiarijiajiniji, janiyacuaajaari nia nio tiaco cua pueya secojosano tojiriquianoni. ¹⁶Tama janiyajacuaajaari nio tia saquiriojononi cua riuriotaca na quiniuucua. Na jiyaterucuaa pueyaracaanu tii cua sesa jiyaniquishaanura pueya secojosacari janiya. Majaari cua shocotenu quiniutianiya nio cua quiquio. Pueyaraacaanu na niishiriquianocuaajaniya. ¹⁷⁻¹⁸Naacuatej Salomoonnaa, quiaa jaara saaja maninia miijiojua quiri quiria taa quia shipininio David quiquiaaricuaani, naajuhuaaj, quiaa jaara quiarijia cua sequesano miijiojua quiriquia taa cua sequeree quiajaniyacuaajaniya, cunocuaajaari maninia. Quiaa jaara naa cua sequesano tojjia quiriquatej, janiyari quiaara tohuateriquiano tariucuaacaanu seetanujuanaa cua sequesano quia shipininio Davidni. Janiyacuajaari naa na sequenoni: ‘Quia niquihuajininionini,

pueyaracaanu nojorijinijinio
 supueriquianoori niquiriyatu narta
 Israel pueya camarnu quiriquiano.’
 19-20 Saniniuujia, niaa jaara cucuaji
 carejere, naajuhuj niaa jaara niaarano
 cua sequesano shocotere, nia tojiniu
 paniyaquiniuucua niaara cua naajioni,
 tama nia jeecojosano casamiicua
 mojuquetacojuaca nia quiniuria, naa
 sacuaraatia miijiaca nia quiniuucuatej,
 janiyari niaarano cua niqutiosano
 jiyajiniji nia taanuuriquianoni.
 Naajuhuj, janiyari nio tia
 niyarataniquianoni, nojuhuana juhua
 secojonuujuarano cua jiyatesano cua
 quijiarano juucuan. Janiya tamonu
 jiyacajinijinio taucuaca tojetenutaniya
 niaacuarani puetunu niajanijajanaa
 cuara nojori rerequetesano quiiria
 pueyaracaanura. 21 Naajuhuj, nio

secojojua tiaari jiyanohua timitiasano
 quijia juucua, saniniuujia, cuno tiaari
 na nujuatasaquiji juurequeriquiano na
 niyaratasaanuucua. Jiyacaritij, nocuma
 tajinihuataja pueyari nocuaji
 jiuujiateriquiano. Naa tama
 nequesoreetooriquianojaarijiatej:
 ‘¿Casaara naa Pueyaso miiriucuaa nio
 pueyacuaani na secojonuujua
 tiajaajanio?’ 22 Naa riucusaariquianoori:
 ‘Nojoriiri naa miishaarucuaaquij, nojori
 supuetanaa Pueyaso nojori
 samiritianuucua. Cuno Pueyasocuajaari
 nojori mashiquinio taucuaca Egipto
 jiyajiniji. Naa miishaarucuaajaariuhuj,
 tama nojori jeecojosano casamiicua
 jacamatujuaca nojori quiniuucua.
 Pueyasoori naacua nojori paraa
 shanacurucuaaquij naa taraatia nojori
 miishaanura.’”